

四庫全書

史部

欽定四庫全書

史部

欽定續通志卷四十五

六

主事臣尹壯圖覆勘

總校官原任侍講臣王昶緒

欽定四庫全書

欽定續通志卷四十五

遼紀五

興宗 道宗一

興宗皇帝諱宗真字雅布濟小字濟古爾聖宗長子也  
母曰欽哀皇后蕭氏帝善騎射好儒術通音律初封梁  
王太平元年冊為皇太子判北南院樞密使事十一年  
六月己卯聖宗崩太子即皇帝位于柩前壬午尊母蕭

氏為皇太后甲申遣使告哀于宋及夏高麗辛卯大赦  
改元景福辛丑駙馬蕭哲伯埒蕭必塔賜死殺圍場都  
太師女真珠格爾右祇候郎君詳袞蕭推魯等七人遷  
齊天皇后于上京秋七月丙午朔皇太后率皇族大臨  
于太平殿高麗遣使弔慰帝與晉王蕭布庫等飲博夜  
分乃罷丁未擊鞠戊申以耶律罕巴為左伊勒希巴特  
穆爾為左祇候郎君詳袞橫帳郎君樂古權右祇候郎  
君詳袞己酉以耶律哲魯為伊濟迪里都詳袞果巴為

右皮室詳袞庚戌振蔚州民饑甲寅錄囚乙卯以比歲  
豐稔罷給東京統軍司糧丁巳以蕭阿克展為東京留  
守辛未錄囚九月戊申躬視慶陵辛亥宋遣使來致祭  
慰兩宮及賀即位賀皇太后冊禮甲戌遣御史中丞耶  
律耆司農卿張確詳袞耶律勵四方館使高維翰使宋  
謝弔慰冬十月戊寅呂德懋薨癸未殺哲伯埒黨彌勒  
努觀音努等丙戌遣工部尚書高德順崇祿卿李可封  
致先帝遺物于宋以右領軍衛上將軍耶律遜少府監

馬憚充皇太后謝宋使右監門衛上將軍耶律元載引  
進使魏永充皇帝謝宋使戊戌以蕭格趙為果耶律郁  
馬保業充來歲賀宋正旦使閏月辛酉閱新造鎧甲丁  
卯振黃龍府饑民十一月甲午葬聖宗皇帝于慶陵乙  
未祭天地丙申謁慶陵十二月癸丑至自慶陵皇太后  
聽政是歲以興平公主下嫁夏國王李德昭子元昊  
重熙元年春正月壬申朔皇太后御正殿受帝與羣臣  
朝宋遣使來賀乙亥宋使來賀永壽節丁丑如雪林二

月大蒐三月壬申朔以尚父漆水郡王迪里復為特哩  
袞是春皇太后弒齊天皇后于上京夏四月乙巳清暑  
於巴納登秋七月獵于平地松林以蕭達溥王英秀蕭  
麓張素羽充來歲賀宋正旦生辰使八月丙午駐蹕拉  
河源冬十一月己酉如中京十一月己卯帝率羣臣上  
皇太后尊號曰法天應運仁德章聖皇太后羣臣上皇  
帝尊號曰文武仁聖昭孝皇帝大赦改元癸未宋使來  
賀應聖節夏國王李德昭薨冊其子元昊為夏國王十

二月庚戌宋遣使來賀來歲正旦又遣使來賀永壽節  
以北大王耶律求翰同平章事

二年春正月庚辰東辛宋使來告母后劉氏哀又使來  
饋母后遺物即遣延昌宮使耶律壽寧給事中知制誥  
李奎充祭奠使天德軍節度使耶律卿寧大理卿和道  
亨河西軍節度使耶律嵩引進使馬世卿充兩宮弔慰  
使秋七月甲子朔以耶律楚高升耶律迪王惟允充兩  
宮賀宋生辰使副以耶律師古劉五常充賀宋來歲正



旦使副八月丁酉如溫泉宮乙卯遣使閱諸路禾稼冬  
十一月甲申宋遣使來謝慰奠十二月乙未又遣使來  
賀應聖節己酉禁夏國使私市金鐵甲寅宋遣使來賀  
永壽節及來歲正旦庚申以北府宰相蕭孝先為樞密  
使

三年春正月丁卯宋氏章頻卒命近侍護喪以歸辛卯  
如春水二月壬辰以北院樞密使蕭布庫為東京留守

夏四月甲寅振伊瑪齊部

部族表在  
元年四月

五月庚申清暑于

沿柳湖是月皇太后還政于帝躬守慶陵

按通鑑及契丹國志實遷

之慶州后傳亦載其事紀諱之也

六月己亥以蕭布庫為南院樞密使

秋七月戊子朔帝始親政以耶律庶徵劉六符耶律睦  
薄可久充賀宋來歲正旦使副壬辰如秋山冬十月己  
未駐蹕中會川十二月宋遣使來賀來歲正旦及永壽  
節

四年春正月庚寅如伊瑪齊里三月乙酉朔立皇后蕭  
氏夏四月甲寅朔如涼陁五月庚子清暑于散水源六

月癸丑朔以耶律信呂士宗蕭袞郭揆充賀宋生辰及  
宋歲正旦使副秋七月壬午朔獵于黑嶺九月己酉駐  
蹕長寧淀冬十月如王子城十一月壬午改南京總管  
府為元帥府乙酉行柴冊禮于白嶺大赦加尚父耶律  
信寧政事令耶律求翰耆宿贊翊功臣十二月癸丑詔  
諸軍砲弩弓劍手以時閱習庚申宋遣使來賀永壽節  
及正旦

五年春正月甲申如魚兒樂夏四月庚申以潞王察克

為南府宰相崇德宮使耶律瑪嚕為特哩衮丁卯頒新  
定條制己巳帝與大臣分朋擊鞠五月甲午南辛丁未  
如呼圖哩巴山清暑秋七月辛丑錄囚九月癸巳獵于  
黃花山冬十月丁未如南京辛亥曲赦析津府囚壬子  
始御試進士宋遣使來賀永壽節甲子幸禮部貢院以  
耶律祥張素民耶律甫王澤充賀宋生辰正旦使副

六年春正月丁丑西辛三月戊寅以秦王蕭孝穆為北  
院樞密使徙封吳王晉王蕭孝先為南京留守夏四月

獵于野狐嶺閏月獵于龍門縣西山五月己酉清暑于  
炭山以耶律罕巴為北院大王蕭巴噶左伊勒希巴王  
子郎君詳袞布古德林牙簽北面事耶律尼格同簽點  
檢司甲寅錄囚丙辰以耶律信寧為西南路招討使癸  
亥以上京留守耶律呼圖克昆為南大王平章事蕭拉  
納上京留守侍中管寧行宮都部署耶律普努寧烏爾  
古達魯特都詳袞甲子以上京留守耶律鴻觀為北院  
大王六月壬申朔以善寧為殿前都點檢護衛太保耶

律和卓兼長寧宮使蕭額魯哩耶律烏拉噶耶律和尚  
蕭罕嘉努蕭特哩蕭求翰為各宮都部署己卯祀天地  
丙申以北院大王浩善為南京統軍使秋七月壬寅以  
皇弟重元生子曲赦死罪以下癸卯如秋山八月己卯  
罷伊濟等五國酋帥以契丹節度使一員領之冬十月  
癸酉駐蹕石寶岡十一月辛亥以契丹行宮都部署蕭  
惠為南院樞密使壬子以管寧為南院樞密使蕭縹古  
諸行宮都部署耶律紐幹哩知南面行宮副部署蕭額

魯哩左祇候郎君詳袞耶律和卓右祇候郎君詳袞封  
子洪基為梁王十二月以楊佺為忠順軍節度使遣耶  
律幹秦鑑耶律德崔繼芳賀宋生辰及正旦

七年春正月戊戌朔宋使來賀正旦及永壽節辛丑如  
混同江二月庚午如春州乙亥駐蹕東川壬午幸五坊  
閑鷹鵲乙酉遣使于慶州問皇太后安三月壬寅如蒲  
河淀甲寅錄囚夏四月己卯獵于白馬塢甲申射兔于  
新淀井乙未獵于金山秋七月甲辰錄囚戊申如黑嶺

九月丁未駐蹕平定冬十月甲子朔渡遼河丙寅駐蹕

白馬淀壬申錄囚十一月癸巳朔以耶律元方張泥韓

至德蕭傳充賀宋生辰正旦使副

按長編元方作九方張泥作張渥至德作

志德蕭傳作蕭導

庚申錄囚十二月己巳以太弟重元判北南

院樞密使事北府宰相賽音巴寧再任兼知東京留守

事耶律寧溫南府宰相察噶扎大內特哩袞伊實已帳

蕭翰乾州節度使劉六符參知政事王子帳冠格王子

郎君詳袞吹網大王平州節度使宰臣張克恭守司空



宰臣韓紹芳加侍中特哩袞耶律瑪魯北院宣徽使傳  
父耶律吉遜南府宰相癸未宋使來賀永壽節丁亥錄  
囚南面侍御準格爾詐取女真貢物罪死帝以有吏能  
黥而流之

八年春正月壬辰朔宋遣時來賀丙申如混同江觀魚  
戊戌振丕勒部庚戌乂魚于實默里河丁巳禁朔州鬻  
羊于宋二月丙子駐蹕長春河夏六月乙丑詔括戶口  
秋七月丁巳謁慶陵迎皇太后還京冬十月駐蹕東京

十一月戊申皇太后行再生禮大赦閏十二月壬辰宋使來賀永壽節

九年春正月丙辰朔宋遣使來賀庚申如混同江二月駐蹕魚兒濼三月辛未以應聖節大赦夏五月乙卯朔清暑于永安山六月射柳祈雨秋七月癸酉宋遣使以伐夏來報遣樞密使杜防報聘丁丑如秋山冬十月癸未駐蹕中會川十一月甲子女真侵邊發黃龍府鐵驪軍拒之宋使來賀應聖節十二月辛卯以蕭迪劉三嘏

耶律元方王惟吉耶律庶忠孫文昭蕭紹筠秦德昌充  
賀宋生辰及來歲正旦使副

十年春正月辛亥朔宋遣使來賀甲子復遣使來賀永  
壽節二月庚辰朔詔博囉滿達部歸哈斯罕戶之沒入  
者使復業夏四月詔罷修鴨綠江浮梁及漢兵屯戍之  
役六月戊寅以蕭寧耶律坦崔禹稱馬世良耶律仁先  
劉六符充賀宋生辰使副耶律庶成趙成耶律烈張旦  
充來歲賀宋正旦使副秋八月射虎于醫巫閭山九月

庚申皇太后射獲熊帝進酒為壽癸亥獵于馬盂山丙寅夏國獻宋俘冬十月庚寅以女真太師塔雅克為哈斯罕都大王壬辰以皇子生肆赦甲午如中京庚子以駙馬都尉蕭呼哩為國舅詳袞是月獵于烽臺山十二月丙子朔宋遣使來賀應聖節乙未置塔卓卜酋長以和塔拉為平章事遣蕭英劉六符使于宋庚寅宋使來賀永壽節及來歲正旦丁酉議伐宋詔諭諸道

十一年春正月戊申奉迎皇太后于內殿庚戌遣南院

宣徽使蕭特默翰林學士劉六符使于宋取晉陽及瓦  
橋以南十縣地且問興師伐夏及沿邊疏濬水澤增益  
兵戍之故二月壬寅如鴛鴦灤夏四月甲戌朔頒南征  
賞罰令六月乙亥宋遣富弼張茂實奉書來聘以書答之  
秋八月丙申宋復遣富弼張茂實奉書來聘乞增歲幣  
銀絹以書答之九月壬寅遣北院樞密副使耶律仁先  
漢人行宮副部署劉六符使宋約和閏月辛卯仁先劉  
六符還進宋誓書宋遣梁適報使

據宋史  
增輯

是月如南京

冬十一月丁亥羣臣加上尊號曰聰文聖武英畧神功睿哲仁孝皇帝冊皇后蕭氏曰貞懿宣慈崇聖皇后大赦梁王洪基進封燕王是月遣使如宋報徹兵

據宋史增輯

十二月甲辰封太弟重元子尼嚕古為安定王辛亥詔蜀預備伐宋諸部租一年壬子以吐渾党項多鬻馬夏國詔謹邊防己未宋遣使來賀正旦及永壽節

十二年春正月辛未遣同知析津府事耶律迪里樞密院都承旨王惟吉諭夏國與宋和壬申以吳王蕭孝穆

為南院樞密使北府宰相蕭孝忠北院樞密使封楚王  
韓王蕭惠北府宰相同知元帥府事罕巴南院大王耶  
律喇實東京留守北院樞密副使耶律仁先同知東京  
留守事北面林牙蕭格北院樞密副使甲戌如武清寨  
葦淀二月壬寅禁關南漢民弓矢己酉夏國以加尊號  
遣使來賀甲寅耶律迪里等使還奏夏國罷兵即遣使  
報宋三月辛卯如南京夏五月乙未詔復定禮制是月  
如山西六月甲子以吳王蕭孝穆為北院樞密使徙封

齊王秋七月丙寅朔北院樞密使蕭孝忠薨特釋繫囚  
庚寅夏國遣使請伐宋不許八月辛丑燕王洪基加尚  
書令知北南院樞密使事進封燕趙國王戊午以前西  
北路招討使蕭塔喇噶為右伊勒希巴庚申裕悅耶律  
鴻觀薨九月獵于伊喇永安諸山冬十月丁酉駐蹕中  
會川己亥北院樞密使蕭孝穆薨庚子詔諸路上重囚  
遣官詳讞辛亥以參知政事韓紹芳為廣德軍節度使  
三司使劉六符長寧軍節度使壬子以夏人侵党項遣



使讓之甲子以北府宰相蕭惠為北院樞密使幽王遂哥為特哩袞特哩袞達魯噶封漆水郡王西北路招討使樞密副使蕭阿拉同知北院宣徽事十一月丁亥復上京民租稅

十三年春正月戊辰如混同江辛未獵于烏爾袞岡二月庚戌如魚兒灤丙辰以參知政事杜防為南府宰相三月丁亥以宣政殿學士楊佺參知政事夏四月己酉遣東京留守耶律浩善知黃龍府事耶律烏魯斯將兵

攻博囉滿達部甲寅党項等部叛附夏國丙辰山西  
部族節度使庫哩以五部叛入于夏五月壬戌朔西南  
面招討都監羅漢努與党項戰不利招討使蕭布達四  
捷軍詳袞張佛努死之李元昊來援叛黨戊辰徵諸道  
兵討元昊六月甲午準布酋長烏巴遣其子執元昊所  
遣使烏頁改來請以兵助戰許之駐蹕永安山以將  
伐夏遣延昌宮使耶律高嘉努告宋丁未錄囚秋七  
月庚午行再生禮庚辰夏國遣使來朝羈之八月丁  
巳夏國復

遣使來答之九月戊辰宋以親征夏國遣使致贐壬申  
會大軍于九十九泉以太弟重元北院樞密使韓王蕭  
惠將先鋒兵西征冬十月庚寅祭天地丁酉李元昊上  
表謝罪己亥元昊乞收叛黨以獻辛亥元昊遣使進方  
物壬子軍于河曲元昊親率党項三部來詔詰其罪癸  
丑督數路兵襲之駙馬都尉蕭呼圖克為夏人所執丁  
巳元昊遣使以先被執者來歸詔亦還其使是月獵于  
陰山十一月甲子班師丁卯改雲州為西京十二月己

丑如西京戊戌以北院樞密副使耶律迪里為右伊勒希巴戊申蕭呼圖克自夏來歸

十四年春正月庚申以侍中蕭錫喇為南院統軍使封

遼西王庚午如鴛鴦濼壬午以金吾衛大將軍達嚕嚕

為伊實大王遣使如宋

據宋史增輯

二月庚子駐蹕薩喇濼

三月己卯宋以伐夏師還遣使來賀夏閏五月癸丑清

暑于永安山秋七月戊申駐蹕中會川九月獵于平川

冬十月甲子望祀木葉山是月遣使如宋

據宋史增輯

十一

月甲辰以同知北院宣徽事蕭阿拉為北府宰相十二  
月癸亥決滯獄

十五年春正月乙酉如混同江二月乙卯如長春河丙  
寅博囉滿達界海蘭河戶來附三月乙酉以應聖節減  
死罪徒以下原之夏四月戊午罷約尼帳戍軍壬戌以  
北女真詳袞蕭噶魯為奚六部大王甲子清暑于永安  
山甲戌博囉滿達海蘭河百八十戶來附六月癸丑以  
西京留守耶律瑪魯為漢人行宮都部署參知政事楊

佶為武定軍節度使甲戌西北路招討使耶律達魯噶  
坐贓免官秋七月戊子觀穫乙未以北院宣徽使埒富  
為左伊勒希巴前南府宰相耶律吉遜為東北路詳衮  
丙申籍諸路軍丁酉如秋山辛丑禁扈從踐民田丁未  
女真部長扎穆率衆來附八月癸丑高麗王欽薨冬十  
月己丑駐蹕中會川十一月丁亥以南院樞密使蕭孝  
友為北府宰相契丹行宮都部署耶律仁先南院大王  
北府宰相蕭格同知北院樞密使事知伊勒希巴事耶

律信先漢人行宮都部署左伊勒希巴埒富特哩衮漢  
人行宮都部署耶律迪里左伊勒希巴已亥括渤海部  
軍馬乙巳振南京貧民十二月壬申曲赦徒以下罪

十六年春正月己卯如混同江二月庚申如魚兒濼三  
月丁亥如黑水濼夏四月乙巳朔皇太后不豫帝馳往  
視疾丙午復如黑水濼丁卯肆赦六月戊申清暑于永  
安山戊午詔士庶言事秋七月辛卯如慶州自是月至  
于九月日射獵于楚布溝實喇錫倫石塔諸山冬十月

辛亥如中京丙辰定公主行婦禮于舅姑儀十一月戊寅祠木葉山己丑如中京朝皇太后十二月乙卯以太后疾愈減雜犯死罪徒以下免庚申以南府宰相杜防為武定軍節度使

十七年春正月丁亥如春水閏月癸丑射虎于哈爾吉二月辛巳振頁袞徹木袞部是月詔士庶言國家利便奴婢所見許白其主不得自陳夏國王李元昊薨其子諒祚遣使來告即遣永興宮使耶律紐幹哩右衛護太



保耶律轄魯將作少監王全慰奠三月癸卯以同知南京留守事蕭塔喇噶為左伊勒希巴知右伊勒希巴事唐古為右伊勒希巴丙午夏國李諒祚遣使上其父元昊遺物丁卯鐵不得國使來乞以本部軍助攻夏國不許夏四月辛未武定軍節度使杜防復為南府宰相甲申博囉滿達部大王佛寧以造舟人來獻秋七月丁未裕悅瑪摩約之子布格及伯哩八部額爾奇木和費延等內附甲寅錄囚減雜犯死罪八月丙戌復南京貧戶

租稅戊子以殿前都點檢耶律義先為行軍都部署中  
順軍節度使夏行美副部署東北面詳衮耶律珠展為  
監軍伐富珠哩酋托多羅冬十月甲申南院大王耶律  
罕巴薨甲午駐蹕都爾嘉十一月乙未遣使括馬丁巳  
賜太弟重元金券封皇子和隆鄂為越王阿林許王忠  
順軍節度使謝嘉努陳王西京留守特布漢王特哩衮  
埒富遼西郡王行宮都部署布古德柳城郡王奉陵軍  
節度使海古勒饒樂郡王安定郡王尼魯古進封楚王

十八年春正月戊戌留夏國賀正使不遣己亥遣北院  
樞密副使蕭惟信以伐夏告宋辛丑錄囚丙午如鴛鴦  
灤丙辰獵于拜塔山耶律義先奏富珠哩捷二月乙酉  
耶律義先等執托多羅以獻三月壬子以燕趙王洪基  
疾愈赦雜犯死罪以下丁巳烏爾古遣使送款夏四月  
癸酉以南府宰相耶律果實為南京統軍使五月甲辰  
五國酋長各率其部來附六月壬戌以韓王蕭惠為河  
南道行軍都統趙王蕭孝友漢王特布副之乙丑錄囚

丙寅行十二神纛禮己巳宋以伐夏遣使致贐辛巳夏  
國使來貢留之不遣丁亥行再生禮秋七月戊戌親征  
八月辛酉渡河夏人遁乃還九月丁未蕭惠等為夏人  
所敗冬十月北道行軍都統耶律達嚕噶率津布諸軍  
至賀蘭山獲李元昊妻及其官僚家屬遇夏人來戰殪  
之烏爾古德呼勒部都詳袞蕭慈實努南剋耶律幹里  
死焉十二月己卯錄囚

十九年春正月庚寅僧惠鑑加檢校太尉庚子耶律達

嚕嚕復封漆水郡王辛丑遣使問罪于夏國壬寅如魚  
兒灤二月丁亥夏將旺布威赫伊特凌結等來攻金肅  
城南面林牙耶律高嘉努等破之殺威赫伊特凌結三  
月戊戌殿前都點檢蕭達勒達與夏人戰于三角川敗  
之癸卯命西南招討使蕭博諾北院大王伊遜林牙蕭  
薩滿等帥師伐夏以行宮都部署布古德監戰甲辰遣  
同知北院樞密使蕭格按軍邊城以為聲援己酉駐蹕  
息難淀是月遣使以伐夏師還告宋宋遣使報聘

據宋  
史增

輯夏四月丙寅如魚兒濼五月己丑如涼陁癸巳蕭博  
諾等入夏境俘掠而還丁酉夏國旺布來降六月庚午  
如慶州甲戌宋遣使來賀伐夏捷秋七月壬辰駐蹕科  
里巴延癸巳以燕趙王洪基領北南樞密院戊戌錄囚  
戊申以左伊勒希巴蕭唐古為北院樞密副使壬子獵  
于哈爾吉九月壬寅夏人侵邊達嚕嚕遣將擊敗之冬  
十月庚午還上京辛未夏國王李諒祚母遣使乞依舊  
稱藩壬申釋臨潢府役徒甲戌如中會川十一月庚戌

錄囚壬子以南府宰相韓知白為武定軍節度使樞密

副使楊績為長寧軍節度使是月獵于布延山閏月乙

卯以漢王特布為中京留守辛未以同知北院樞密使

事蕭格為南院樞密使北院大王耶律仁先知北院樞

密使事封吳王

北院大王紀作南院大王吳王  
紀作宋王並誤茲據本傳改

十二月

丁亥以北府宰相趙王蕭孝友為東京留守東京留守

塔喇噶為北府宰相南院樞密使潞王察克為南院大

王庚戌韓王蕭惠徙封魏王致仕壬子夏國李諒祚遣

使上表乞依舊臣屬

二十年春正月戊戌

據朔考正月無戌戌日茲姑仍之

駐蹕混同江二

月甲申遣前北院都監蕭友括等使夏國索党項叛戶

已丑如蒼耳濼三月壬子朔如黑水夏五月癸丑蕭友

括等使夏還李諒祚母表乞如党項權進馬駝牛羊等

物已巳夏國遣使求唐隆鎮及乞罷所建城邑以詔答

之六月丙戌詔以所獲李元昊妻及前後所俘夏人安

置蘇州以伐夏所獲物遣使遺宋秋七月如秋山九月



詔更定條制駐蹕中會川冬十月己卯括諸道軍籍十一月庚申以特哩袞都監蕭穆魯為左伊勒希巴甲子命東京留守司總領戶部內省事十二月乙酉皇太后行再生禮肆赦

二十一年春正月辛亥如混同江二月如魚兒濼夏四月癸未以國舅詳袞蕭阿剌為西北路招討使封西平王六月丙子駐蹕永安山是月遣使詣五國諸部捕海東青鵠秋七月戊申祀天地壬子追尊太祖之祖為簡

獻皇帝廟號玄祖太祖之考為宣簡皇帝廟號德祖以  
燕趙王洪基為天下兵馬大元帥知特哩衮事甲子如  
秋山戊辰以南院樞密使蕭格為北院樞密使封吳王  
辛未如慶州八月戊子太尉烏哲薨冬十月戊寅駐蹕  
中會川丁亥夏國李諒祚遣使乞弛邊備戊子如顯懿  
二州甲午遼興軍節度蕭實喇封鄭王南院大王潞王  
察克為南院樞密使進封越王戊戌射虎于南薩哈巴  
十一月甲子次中會川丙寅錄囚十二月戊戌以北府

宰相塔喇噶為南京統軍使鄭王實喇北府宰相契丹行宮都部署耶律義先特哩袞

二十二年春正月乙巳如混同江二月丙子回鶻阿爾斯蘭為隣國所侵遣使求援庚辰如春水三月癸亥李諒祚以賜詔許降遣使來謝丙寅如黑水灤夏四月戊子獵于鶴淀六月壬申駐蹕呼哩山秋七月庚申如黑嶺九月壬辰夏國李諒祚遣使進降表甲午遣南面林牙高嘉努等奉詔撫諭之是月駐蹕額爾袞坡冬十二

月丙申朔詔回鶻部副使以契丹人充庚子以應聖節  
曲赦徒以下罪

二十三年春正月己巳如混同江癸酉獵于雙子淀壬  
辰如春水甲午獵于盤直坡夏四月癸丑獵于和濟格  
爾五月己巳李諒祚乞進馬馳詔歲貢之庚寅駐蹕永  
安山六月丙申如慶州秋七月己巳夏國李諒祚遣使  
來求婚甲戌如秋山己卯詔八房族巾幘冬十月丁酉  
駐蹕中京戊戌幸新建祕書監辛丑有事于祖廟癸丑

以開泰寺鑄銀佛像曲赦在京囚丙子李諒祚遣使進  
誓表十一月壬申帝率羣臣上皇太后尊號曰仁慈聖  
善欽孝廣德安靜貞純懿和寬厚崇覺儀天皇太后大  
赦內外官進級有差癸未錄囚甲申羣臣上皇帝尊號  
曰欽天奉道祐世興厯武定文成聖神仁孝皇帝冊皇  
后蕭氏曰貞懿慈和文惠孝敬廣愛崇聖皇后十二月  
丙申加中會川

二十四年春正月癸亥如混同江辛巳宋遣使來賀二

月己丑朔召宋使釣魚賦詩癸巳如長春河三月癸亥以太弟重元生子曲赦行在及長春鎮北二州徒以下罪夏五月駐蹕南崖秋七月壬午如秋山次南崖之北峪帝不豫八月戊子大赦己丑帝崩于行宮年四十諡曰神聖孝章皇帝廟號興宗

興宗景福一年

即聖宗太平十一年

重熙二十四年凡二十

五年

道宗皇帝諱洪基字納琳小字察喇興宗皇帝長子也

母曰仁懿皇后蕭氏初封梁王重熙十一年進封燕國  
總領中丞司事明年總北南院樞密使事加尚書令進  
封燕趙國王二十一年為天下兵馬大元帥知特哩袞  
事預朝政二十四年八月丁亥興宗疾大漸召帝諭以  
治國之要己丑興宗崩即皇帝位于柩前壬辰以皇太  
弟重元為皇太叔免漢拜不名癸巳遣使報哀於宋及  
夏高麗甲午遣重元安撫南京軍民戊戌以遺詔命西  
北路招討使西平王蕭阿拉為北府宰相仍權知南院

樞密使事北府宰相蕭實喇為武定軍節度使辛丑改  
元清寧大赦九月乙丑賜內外官爵賞有差庚午尊皇  
太后為太皇太后辛未遣左伊勒希巴蕭穆魯翰林學  
士韓運以先帝遺物遺宋癸酉遣使以即位報宋丙子  
尊皇后為皇太后以上京留守宿國王辰類為南京留  
守壬午遣使賜高麗夏國先帝遺物冬十月丁亥以吳  
王仁先同知南京留守事陳王圖伯特為南府宰相進  
封吳王壬寅以順義軍節度使實紳努為南院大王十



一月甲子葬興宗皇帝于慶陵宋及高麗遣使來會丙寅以南院大王海古勒為中京留守北府宰相西平王蕭阿拉進封韓王壬申次懷州有事于太宗穆宗廟甲戌謁祖陵戊寅冬至有事于太祖景宗興宗廟十二月丙戌詔內外官秩滿各言事仍轉諭所部無貴賤老幼皆直言無諱戊子冊妃蕭氏為皇后進封弟越王和囉噶為魯王許王阿林為陳王楚王尼嚕古徙封吳王甲午以樞密副使姚景行為參知政事翰林學士吳湛為

樞密副使參知政事同知樞密院事韓紹文為上京留守丙申宋遣使來賀即位戊戌詔設學養士頒五經傳疏于學宮癸卯以知涿州楊績參知政事兼同知樞密院事庚戌以聖宗在時生辰赦上京囚

二年春正月丙辰詔州郡官決囚如諸部族例是月如魚兒灤二月乙酉以左伊勒希巴蕭穆魯知西南面招

討都監事三月丁巳以應聖節曲赦百里內囚是月遣

使如宋

據宋史增輯

閏月己亥始行東京所鑄錢乙巳以南

京獄空進留守以下官夏六月丁巳詔宰相舉才能之士戊午命有司籍軍補邊戊丁丑以南院樞密使趙國王察克為上京留守同知南京留守事吳王仁先為南院樞密使乙酉遣使分道平賦稅繕戎器勸農桑禁盜賊八月辛未如秋山九月庚子如中京冬十月丙子如中會川十一月戊戌以知左伊勒希巴事耶律華喇為伊勒希巴北院大王耶律仙童知黃龍府事甲辰羣臣上尊號曰天祐皇帝后曰懿德皇后大赦乙巳以皇太

叔重元為天下兵馬大元帥徙封趙王察克為魏王魯

王和囉噶為宋王陳王阿林為秦王吳王尼嚕古進封

楚王百官進秩有差十二月戊申以韓王蕭阿拉為北

院樞密使徙封陳王

據阿拉  
傳增輯

東京留守宿王辰類北府

宰相宋王和囉噶上京留守秦王阿林知中丞司事甲

寅上皇太后尊號曰慈懿仁和文惠孝敬廣愛宗天皇

太后

三年春正月庚辰如混同江二月己未如大魚澤三月

辛巳以楚王尼嚕古為武定軍節度使夏四月丙辰清  
暑于永安山五月己亥如慶陵六月辛未以魏王察克  
為特哩袞同知樞密院事蕭唐古南府宰相魏王特布  
東京留守秋七月乙酉如秋山九月庚子如中會川冬  
十一月丙子以左伊勒希巴蕭穆嚕為契丹行宮都部  
署十二月庚戌禁職官于部內假貸貿易戊辰太皇太  
后不豫曲赦行在五百里內囚已巳太皇太后崩是歲  
再遣使如宋求宋主御容

據宋史  
增輯

四年春正月壬申朔遣使報哀于宋夏如混同江釣魚  
癸酉宋遣使奉宋主繪像來二月丙午詔伊勒希巴諸  
路鞠死罪仍令別州縣覆案稱寃者即具奏庚戌如魚  
兒濼三月戊寅募天德鎮武東勝等處勇捷者籍為軍  
甲午肆赦夏四月丁卯宋遣使弔祭五月乙酉如永安  
山清暑是月遣使致太后遺物于宋

據宋史  
增輯

六月乙丑

以北院樞密使鄭王蕭格為南院樞密使徙封楚王南  
院樞密使吳王仁先為北院樞密使秋七月壬午獵于

黑嶺九月遣使如宋

據宋史增輯

冬十月戊戌朔以同知東

京留守事海古勒為南院大王保安軍節度使希達為

奚六部大王十一月癸酉行再生及柴冊禮庚寅大赦

以吳王仁先為南京兵馬副元帥徙封隋王丙戌祠木

葉山十二月辛丑弛塔納水獺裘之禁辛亥以南院樞

密使楚王蕭格復為北院樞密使閏月己巳賜皇太叔

金券

五年春如春州夏六月甲子朔駐蹕納克灤己丑以南

院樞密使蕭阿蘇為北府宰相樞密副使耶律伊遜南  
院樞密使特哩袞察克遼興軍節度使魯王謝嘉努武  
定軍節度使東京留守吳王特布西京留守秋七月丁  
酉以烏爾古德噶勒詳袞蕭穆魯為伊勒希巴冬十月  
壬子朔如南京十一月禁獵十二月壬戌以北院林牙  
奚瑪魯為右伊勒希巴

六年春如鴛鴦濼夏五月己酉駐蹕納克濼六月戊午  
以東北路女真詳袞高嘉努為特哩袞壬戌遣使錄囚



丙寅中京置國子監命以時祭先聖先師癸未以隋王仁先為北院大王冬十月甲子駐蹕藕絲淀

七年春三月庚戌如春州以耶律伊遜知北院樞密使事夏五月丙戌清暑于永安山辛亥殺東京留守陳王蕭阿拉六月甲子以蕭穆魯為順義軍節度使戊辰行再生禮丁丑以楚王尼嚕古知南院樞密使事秋九月丁丑駐蹕藕絲淀冬十一月壬午以知黃龍府事耶律

阿勒扎為南院大王

本傳南院作北院

八年春正月癸丑如混同江二月駐蹕納克樂三月戊申楚王蕭格致仕進封鄭王夏五月武都溫特哩袞圖圖爾噶等乞歲貢馬馳六月丙子朔駐蹕圖古勒辛丑以右伊勒希巴奚瑪噶為奚六部大王秋七月甲子射熊于愛實拉冬十月甲戌朔駐蹕都爾嘉十二月庚辰以知北院樞密使事蕭特古斯為北院樞密使癸未如西京戊子以皇太后行再生禮曲赦西京囚

九年春正月辛亥如鴛鴦濼辛未禁民鬻銅三月辛未

宋主禎殂以姪曙為子嗣位遣使來告

據宋史增輯

夏五月

丙午以隋王仁先為南院樞密使徙封許王是月清暑

于赫呼蘇六月遣使如宋祭弔

據宋史增輯

秋七月丙辰如

太子山戊午皇太叔重元與其子楚王尼嚕古及陳王

辰祿同知北院樞密使事蕭呼圖克衛王特布等反南

院樞密使許王仁先知北樞密院事趙王耶律伊遜等

禦之庚申重元伏誅壬戌以仁先為北院樞密使進封

宋王加尚父耶律伊遜南院樞密使罕嘉努殿前都點

檢封荆王耶律良以密告變授漢人行宮都部署戊辰以黑白羊祭天八月庚午朔遣使安撫南京吏民冬十月庚午以六院部太保耶律和卓知南院大王事是月駐蹕藕絲淀十一月辛丑以南院宣徽使蕭玖格為北府宰相是月遣使如宋賀即位

據宋史  
增輯

十年春正月己亥北幸二月禁南京民決水種粳稻秋七月壬申詔決諸路囚辛巳禁僧尼私詣行在是月獵于赤山九月壬寅如懷州冬十月壬辰朔駐蹕中京戊

年禁民私刊印文字十一月甲子定吏民衣服之制丁  
丑詔求乾文閣所闕經籍命儒臣校讎庚辰以彰國軍  
節度使韓色實為特哩袞詔南京不得私造御用綵段  
私貨鐵十二月癸巳以北院大王蕭烏爾古納為契丹  
行宮都部署是歲遣耶律烈蕭禧等使于宋宋遣使來  
賀生辰及正旦

按此後宋遣使命往來遼史多闕而不  
載茲據宋史增輯其在專使猶可因事  
繫月而凡泛使類于  
年終補之謹識于此

咸雍元年春正月辛酉朔羣臣上尊號曰聖文神武全

功大畧廣智聰仁睿孝天祐皇帝改元大赦立梁王濬  
為皇太子内外官賜級有差甲子如魚兒濬三月丁亥  
以知興中府事楊績知樞密院事夏四月辛卯以知樞  
密院事張嗣復知興中府事庚子清暑于圖古勒六月

宋使來議疆事

據宋史  
增輯

秋七月如黑嶺九月乙亥駐蹕

藕絲淀丁丑以左伊勒希巴繅古為益父房詳衮冬十  
月丁亥朔如醫巫閭山十二月甲午以遼王仁先為南  
京留守徙封晉王辛亥以南京留守蕭惟信為左伊勒

希巴是歲遣耶律仲達蕭惟輔等使于宋宋遣使來賀  
生辰及正旦

二年春正月丁巳如混同江宋賀正使王巖卒以禮送  
還癸未如山榆淀是月復改國號曰遼

據宋史  
增輯

二月甲

午以武定軍節度使姚景行為南院樞密使三月辛巳  
以東北路詳袞耶律韓福努為北院大王夏五月乙亥  
駐蹕圖古勒辛巳以戶部使劉詵為樞密副使秋七月  
癸丑朔以西北路招討使蕭珠展為北府宰相左伊勒

希巴蕭惟信南院樞密使同知南院樞密使事耶律伯  
特哩袞丙辰南院樞密使姚景行罷庚申錄囚辛酉景  
行復前職丁卯如藕絲淀以歲旱遣使振山後貧民九  
月壬子朔以參知政事韓孚為樞密副使冬十二月壬  
午以知樞密院事楊績為南院樞密使樞密副使劉詵  
參知政事戊子僧守志加守司徒丁酉以西京留守和  
卓為南院大王辛丑以蕭珠展為武定軍節度使是歲  
遣蕭靖等使于宋宋遣使來賀生辰及正旦



三年春正月辛亥如混同江三月癸亥宋主曙殂子頊  
嗣位遣使告哀即遣右護衛太保蕭托卜嘉翰林學士  
陳覺等弔祭閏月辛卯駐蹕春州北浞乙巳以蕭烏爾  
古納為北府宰相夏五月壬辰駐蹕納克濟六月庚戌  
宋遣使饋其先帝遺物辛亥宋以即位遣使來報即遣  
知黃龍府事蕭托古斯中書舍人馬鉉往賀壬戌南府  
宰相韓王蕭唐古罷壬申以廣德節度使耶律瑞努為  
南府宰相度支使趙徽參知政事秋七月如赤山九月

癸卯如南京是月宋遣使來報謝且賀生辰及正旦

史增

輯 冬十二月丁未以參知政事劉詵為樞密副使東

宋

北路詳袞果巴南院大王樞密直學士張孝傑參知政  
事已酉以張孝傑同知樞密院事丁巳行再生禮赦死  
罪以下是月夏國王李諒祚薨是歲遣蕭傑等賀宋正  
旦

四年春正月丙子如鴛鴦濼丁亥獵于炭山辛卯振西  
京饑民二月甲辰朔詔元帥府募軍壬子夏國王李諒

祚子秉常遣使告哀丁卯北辛三月丙子遣使如夏國  
弔祭甲申振應州饑民夏五月丙戌駐蹕圖古勒六月  
丙寅以北院林牙耶律卓克算為北院大王右伊勒希  
巴蕭素颯中京留守秋七月丙子獵于黑嶺九月己亥  
駐蹕藕絲淀冬十月辛亥曲赦南京徒以下囚復永清  
武清安次固安新城歸義容城諸縣一歲租戊辰冊李  
秉常為夏國王是歲遣耶律公質等使于宋宋遣使來  
賀生辰及正旦

五年春三月準布叛以晉王仁先為西北路招討使領  
禁軍討之夏六月己亥駐蹕圖古勒壬戌以南院樞密  
使蕭惟信知北院樞密使事秋九月戊辰仁先奏準布  
捷冬十月己亥駐蹕藕絲淀十一月丁丑五國阿里部  
叛命蕭素颯討之閏月己未僧志福加守司徒十二月  
甲子行皇太子再生禮減諸路徒以下罪是歲遣耶律  
昌蕭惟禧等使于宋宋遣使來賀生辰及正旦

六年春正月甲午如千鵝瀛夏五月甲辰清暑于圖古

勒甲寅設賢良科六月乙酉以特哩袞耶律伯為中京  
留守秋七月辛亥獵于和羅努克特八月丙子耶律伯  
薨九月庚戌如藕絲淀冬十月壬申西北路招討司擒  
準布酋長來獻十一月己卯禁衛生熟鐵于回鶻準布  
等界十二月戊午加圓釋法鈞二僧並守司空己未以  
坤寧節赦徒罪以下是歲遣耶律寬蕭遵道等使于宋  
宋遣使來賀生辰及正旦

七年春正月戊子如混同江二月丙寅以南院樞密使

姚景行知興中府事三月己酉如黑水夏四月癸酉如  
納克灤乙亥禁布帛短狹不中尺度者六月癸未南院  
大王果巴罷秋七月甲申朔以東北路詳袞哈爾吉為  
南院大王西南面招討使實德努為奚六部大王己丑  
遣使按五京囚庚子如藕絲淀八月辛巳置佛骨于招  
仙浮圖罷獵禁屠殺冬十月己卯如醫巫閭山壬戌以  
南府宰相耶律瑞努為南京統軍使十一月戊子免南  
京流民租己丑振饒州饑民十二月壬子以契丹行宮

都部署耶律呼圖克知北院樞密使事知北院樞密使  
事蕭惟信為南府宰相兼契丹行宮都部署丁巳漢人  
行宮都部署李仲禧北院宣徽使劉霖樞密副使王觀  
都承旨楊興功各賜國姓是歲遣蕭廣耶律紀等使于宋  
宋遣使來賀生辰及正旦

八年春正月癸未烏爾古德呼勒部詳衮耶律超等奏  
北邊捷甲申如魚兒灤二月戊辰以歲饑復武安州租  
稅振恩蔚順惠等州民夏四月壬子振義饒二州民丁

已駐蹕圖珣實己卯清暑于圖古勒五月壬午晉王仁  
先薨六月甲寅振易州貧民己未振中京甲子振中興  
府甲戌封北府宰相楊績為趙王樞密副使耶律觀參  
知政事兼知南院樞密使事秋七月己卯慶州靳文高  
八世同居詔賜爵丙申振饒州饑民丁酉如黑嶺閏月  
辛未射熊于殺羊山九月甲子駐蹕藕絲淀冬十月己  
丑參知政事耶律觀罷十一月庚戌復祖州稅十二月  
戊辰漢人行宮都部署耶律仲禧封韓國公以樞密副



使參知政事趙徽為武定軍節度使樞密副使柴德滋  
參知政事漢人行宮副部署耶律大悲努為都部署同  
知南院樞密使事蕭罕嘉努知左伊勒希巴事丁丑以  
坤寧節大赦是歲遣耶律適蕭瑜等使于宋宋遣使來  
賀生辰及正旦

九年春正月丁未如雙樂夏四月壬辰如旺國崖秋七  
月甲辰獵于大熊山戊申八錫林德呼勒人殺其節度  
使以叛己酉詔威烏爾古部軍分道擊之內寅南京奏

歸義涑水兩縣蝗飛入宋境八月丙申以耶律仲禧為  
南院樞密使九月癸卯駐蹕都爾嘉冬十月如陰山遂  
如西京十一月戊午復行幸所過租一歲甲子南院大  
王哈爾吉罷十二月辛未以知北院樞密使事耶律伊  
遜為中京留守南院宣徽使耶律薩喇為南院大王是  
歲遣耶律寧耶律洞等使于宋宋遣使來賀生辰及正  
旦

十年春正月乙卯如鴛鴦澤二月癸未蠲平州復業民

組賦三月甲子如圖古勒以耶律超為北院大王是月

遣林牙蕭禧使于宋議河東疆地宋使來報聘

據宋史增輯

夏四月辛未以奚人達嚕三世同居賜官旌之丁酉復

遣樞密副使蕭素與宋議疆地于代州

據宋史增輯

五月丙

寅錄囚六月壬申詔臣庶言得失秋七月丙辰如秋山

九月庚戌如東京癸亥祠木葉山冬十月丁卯駐蹕藕

絲淀十二月辛巳改明年元大赦是歲遣耶律永寧耶

律寧等使于宋宋遣使來賀生辰及正旦

太康元年春正月乙未如混同江壬寅振雲州饑二月

乙酉駐蹕大魚灤丁亥以鷹坊使耶律揚魯為工部尚

書三月復遣蕭禧如宋議疆事宋遣使來報聘

據宋史  
增輯

夏四月丙子振平州饑乙酉如犢山閏月丙午振平灤

二州饑六月癸巳以興聖宮使奚謝嘉努知奚六部大

王事癸卯遣使案諸路囚以特哩衮大悲努為始平軍

節度使參知政事柴德滋武定軍節度使丙辰詔皇太

子總領朝政以武定軍節度使趙徽為南府宰相樞密

副使楊遵勗參知政事秋七月辛酉朔獵于平地松林

丙寅振南京貧民是月宋遣使割地以分水嶺為界

續據

通鑑綱目增輯

九月乙亥駐蹕藕絲淀己卯以南京饑復其租

稅一歲仍出錢粟振之冬十月西北路酋長希斯吹丹

雙寬等來降十一月辛酉皇后被誣賜死殺伶人趙惟

一高長命十二月己丑以南京統軍使耶律瑞努為特

哩袞漢人行宮都部署耶律霖樞密副使同知東京留

守事蕭道拉伊勒希巴庚寅賜張孝傑國姓壬辰以西

欽定四庫全書

欽定續通志

三八

京留守蕭雅魯為左伊勒希巴是歲遣耶律景熙耶律世通等使于宋宋遣使來賀生辰及正旦

二年春正月己未如春水庚辰駐蹕雙灤二月戊子振黃龍府饑癸丑復南京路租稅一歲三月辛酉皇太后崩壬戌遣殿前副點檢耶律轄呼報哀于宋丁卯大赦戊寅以皇太后遺物遣使遺宋夏六月戊子宋及高麗夏國各遣使弔祭己亥駐蹕圖古勒壬寅以北院樞密使魏王耶律伊遜為中京留守丁未冊皇后蕭氏封其

父祗侯郎君必埒哩為趙王叔西北路招討使額哩負  
遼西郡王漢人行宮都部署駙馬都尉錫默柳城郡王  
參知政事楊遵勗知南院樞密使事北院樞密副使蕭  
蘇色知北院樞密使事漢人行宮都部署劉詵參知政  
事己酉南府宰相趙徽罷秋七月戊辰如秋山癸酉錫  
默薨九月戊午以南京蝗復明歲租稅己卯駐蹕藕絲  
淀冬十月戊戌中京留守魏王耶律伊遜復為北院樞  
密使十二月己丑以左伊勒希巴蕭托卜嘉為南院統

軍使是歲遣耶律庶幾耶律運等使于宋宋遣使來賀  
生辰及正旦

三年春正月癸丑如混同江乙卯省諸道春貢金帛及  
傳所輸尚方銀二月壬午朔東北路統軍使蕭罕嘉努  
加尚父封吳王己丑如魚兒濼夏四月乙酉泛舟黑  
龍江五月己巳駐蹕犢山乙亥耶律伊遜奏右護衛太  
保察喇等告北院樞密使蕭蘇色等八人謀立皇太子  
帝以無狀不治出蘇色等補外薩巴等徙于邊丙子以



西北路招討使遼西王蕭額哩頁為北府宰相兼知契丹行宮都部署事戊寅詔告謀逆事者重加官賞六月己卯朔耶律伊遜令牌印郎官蕭額都溫誣首嘗預蘇色等謀籍其姓名以告即命伊遜等鞠治杖皇太子囚之宮中辛巳殺宿直官德埒哩等三人殺宣徽使托卜嘉等二人癸未殺始平軍節度使薩喇等十人又遣使殺上京留守蘇色及薩巴等六人乙酉殺耶律托卜嘉及其弟辰類丙戌廢皇太子為庶人囚之上京殺東京

留守同知耶律和勒博辛卯殺蘇色等諸子戊申遣使  
按五京諸道獄是月避暑于永安山秋七月辛亥牌印  
郎君額都溫授駙馬都尉始平軍節度使壬子以知北  
院樞密副使蕭罕嘉努為漢人行宮都部署乙丑如秋  
山八月庚寅蕭罕嘉努薨冬十月辛丑駐蹕藕絲淀十  
一月耶律伊遜遣盜殺故太子濬于上京閏十二月戊  
午以北府宰相遼西王蕭額哩頁知北院樞密使事左  
伊勒希巴耶律雅克為契丹行宮都部署丙寅預行正

旦禮是歲遣蕭儀耶律孝淳等使于宋宋遣使來賀生  
辰及正旦

四年春正月庚辰如春水甲午振東京饑二月乙丑駐  
蹕掃獲野戌辰以東京統軍使耶律旺玖為特哩衮夏  
四月辛亥高麗遣使乞賜鴨渌江以東地不許五月丙  
戌駐蹕散水原六月獵于黑嶺秋八月癸卯詔有司決  
滯獄九月乙未駐蹕藕絲淀冬十月癸卯以參知政事  
劉仲為保靜軍節度使十一月丁亥禁士庶服用錦綺

日月山龍之文庚寅以南院樞密使耶律仲禧為廣德軍節度使辛卯錦州民張寶四世同居命其諸子三班院祇候十二月丁卯以北院樞密副使耶律霖知北院樞密使事是歲遣耶律仲寧耶律隆等使于宋宋遣使來賀生辰及正旦

五年春正月壬申如混同江癸酉賜宰相耶律孝傑名仁傑乙亥如山榆浚三月辛未以宰相仁傑獲頭鵝加侍中壬辰以北院樞密使魏王耶律伊遜知南院大王

事加裕悅知北院樞密使事耶律霖為北院樞密使北  
院樞密副使耶律德勤忒知北院樞密使事左伊勒希  
巴耶律世遷同知北院樞密使事夏四月己未如納克  
樂五月丁亥以契丹行宮都部署耶律雅克為南府宰  
相北面林牙耶律永寧為伊勒希巴同知南院樞密使  
事蕭朶卜嘉及殿前副點檢駙馬都尉蕭綽哈並封蘭  
陵郡王是月獵于白石山六月丁巳以北府宰相遼西  
王蕭額哩頁為西北路招討使己未遣使錄囚秋七月

己卯獵于夾山九月壬午禁扈從擾民冬十月己亥駐蹕都爾嘉壬子詔惟皇子仍一字王餘並削降丁巳振平州貧民己未以趙王楊績為遼西郡王魏王耶律伊遜降封混同郡王吳王蕭罕嘉努以蘭陵郡王致仕十一月丁丑召沙門守道開壇于內殿癸未復南京流民差役三歲被火之家租稅一歲十二月乙卯如西京戊午行再生禮赦雜犯死罪以下是歲遣蕭晟蕭寧等使于宋宋遣使來賀生辰及正旦

六年春正月癸酉如鴛鴦濼辛卯以耶律伊遜知興中  
府事三月庚寅封孫延禧為梁王以忠順軍節度使耶  
律佛德南院大王耶律仲禧南院樞密使戶部使陳毅  
並參知政事夏四月乙卯獵于炭山五月壬申免平州  
復業民租賦一歲庚寅以旱禱雨命左右以水相沃六  
月戊戌駐蹕納兌濼戊申以度支使王績參知政事秋  
七月戊辰觀市甲申獵于沙嶺九月壬寅祠木葉山已  
酉駐蹕藕絲淀冬十月丁卯以耶律仁傑為武定軍節

度使庚午參知政事劉詵罷癸酉以陳毅為漢人行宮  
都部署王績同知樞密院事十二月甲子以耶律德勒  
岱為孟父詳袞乙丑以蕭托卜嘉為北府宰相耶律世  
遷知北院樞密使事耶律慎思同知北院樞密使事庚  
午復西京流民租賦一歲甲戌減民賦丁亥豫行正旦  
禮戊子如混同江是歲遣耶律永芳蕭偉等使于宋宋  
遣使來賀生辰及正旦

七年春二月甲子如魚兒濼夏五月壬子駐蹕嶺西甲



寅以蕭托卜嘉兼殿前都點檢蕭綽哈為漢人行宮都  
部署兼知樞密院事六月丁卯以翰林學士王言敷參  
知政事封北院宣徽使石篤漆水郡王秋七月戊子如  
秋山八月丁卯射鹿赤山加圍場使尼格為靜江軍節  
度使九月戊子次懷州辛卯次祖州乙巳駐蹕藕絲淀  
冬十月戊辰以特哩袞旺玖為南院大王伊勒希巴奚  
綽奇為彰國軍節度使十一月乙酉詔歲出官錢振諸  
宮分及邊戍貧戶辛亥除絹帛尺度狹短之令十二月

丁卯削武定軍節度使耶律仁傑爵辛未囚知興中府  
事耶律伊遜于萊州是歲遣耶律祐蕭福全等使于宋  
八年春正月甲申如混同江二月戊午如山榆淀辛酉  
詔北南院官凡給驛者必先奏聞己巳夏國獲宋將張  
天一遣使來獻壬申以耶律佛德為南府宰相兼知北  
院樞密使雅克為特哩袞蕭朶卜嘉兼知契丹行宮都  
部署事三月庚戌黃龍府女真部長鐘鼎率部民內附  
是月詔行柁泰所定升斗夏四月壬戌以耶律仁遷為

上京留守六月辛亥駐蹕納克濟丁巳以耶律佛德為  
北院樞密使耶律超格南府宰相劉筠南院樞密使蕭  
托卜嘉兼知北院樞密使事王績漢人行宮都部署蕭  
綽哈國舅詳袞丙子以耶律慎思知右伊勒希巴事秋  
七月甲午如秋山九月丁未駐蹕藕絲淀冬十一月壬  
午以伊實大王蕭哈鳴為南院宣徽使權知奚六部大  
王事圖罕為本部大王十二月癸丑烏爾古德呼勒統  
軍使耶律瑪古為北院大王庚申降皇后為惠妃出居

乾陵是歲遣耶律永端耶律儀等使于宋宋遣使來賀  
生辰及正旦

九年春正月辛巳如春水夏五月如黑嶺六月己未駐  
蹕散水原甲子以耶律阿蘇為契丹行宮都部署耶律  
慎思北院樞密副使庚午詔諸路檢括脫戶罪至死者  
原之閏月丁丑以漢人行宮副部署罕努為南院大王  
戊寅追諡庶人濬為昭懷太子己丑以知興中府事邢  
熙年為漢人行宮都部署漢人行宮都部署王績為南

院樞密副使秋七月乙巳獵於馬尾山癸亥禁外官部  
內貸錢取息及使者館于民家八月高麗王徽薨九月  
己酉射熊于白石山加圍場使尼格左金吾衛大將軍  
己巳以高麗王徽子三韓國公勲權知國事冬十月己  
卯南院樞密使劉筠薨壬辰耶律伊遜伏誅十一月丙  
午進封梁王延禧為燕王大赦以南院宣徽使蕭哈噶  
為南府宰相三司使王經參知政事兼知樞密事十二  
月丁亥以邢熙年知南院樞密使事辛卯以王言敷為

漢人行宮都部署高麗三韓公王勲薨是歲遣蕭固等  
使于宋宋遣使來賀生辰及正旦

十年春正月辛丑朔如春水戊辰如山榆淀二月庚午  
朔蒙古國遣使來聘夏五月壬戌駐蹕散水原六月壬  
辰禁毀銅錢為器秋七月甲辰如黑嶺九月癸亥駐蹕  
藕絲淀冬十二月改明年元赦雜犯死罪以下是歲遣  
蕭浹耶律襄等使于宋宋遣使來賀生辰及正旦

欽定續通志卷四十五

欽定四庫全書

欽定續通志卷四十六

遼紀

六

道宗

二

天祚皇帝

大安元年春正月丁酉如混同江癸卯以王績知南院  
樞密使事邢熙年為中京留守戊申以樞密直學士杜  
公謂參知政事二月辛未如山榆浣夏四月乙酉宋主  
頊殂子煦嗣位使來告哀辛卯西幸六月戊辰駐蹕圖

古勒壬申以王績為南府宰相蕭托卜嘉兼知南院樞  
密使事丁丑遣使弔祭於宋戊寅宋遣使來饋其先帝  
遺物秋七月乙巳遣使賀宋主即位戊午獵于赤山八  
月丁卯如慶州冬十月癸亥駐蹕好草淀甲申以蕭托  
卜嘉為南院樞密使十一月丁酉以南女真詳袞蕭伯  
哩為北府宰相辛亥史臣進太祖以下七帝實錄丙辰  
遣使冊三韓國公王勲子運為高麗國王十二月甲戌  
宋使來謝弔祭遣蕭睦使于宋賀明年正旦

是後宋賀  
生辰正旦



使宋史亦  
多失載

二年春正月辛卯如混同江二月癸酉駐蹕山榆淀夏  
四月戊戌北幸五月丁巳以牧馬蕃息進羣牧官階乙  
亥駐蹕納克灤戊寅宰相梁穎出知興中府事六月丁  
亥朔以左伊勒希巴耶律坦為特哩袞知樞密院事耶  
律額特埒兼知左伊勒希巴事癸卯遣使按諸路獄甲  
辰以同知南京留守事耶律納延知右伊勒希巴事戊  
申以契丹行宮都部署耶律阿蘇兼知北院大王事秋

七月丁巳惠妃母燕國夫人錫庫以厭魅事覺伏誅子  
蘭陵王蕭綽哈除名置邊郡戊午獵於沙嶺乙酉振遼  
州貧民九月庚午還上京壬申振上京中京貧民冬十  
月乙酉朔以樞密副使竇景庸知樞密院事丁亥夏國  
王李秉常薨遣使詔其子乾順知國事十一月甲戌為  
燕王延禧行再生禮曲赦上京囚癸未振乾顯成懿四  
州貧民十二月辛卯以蘭陵郡王蕭托卜嘉為南院樞  
密使

三年春正月乙卯如魚兒灤甲戌振南京貧民仍復其  
租賦二月丙戌振中京饑甲辰除安泊逃戶徵償法三  
月己未復錦州貧民租一歲甲戌復上京貧民租如錦  
州夏四月戊子賜中京貧民帛及免諸路貢輸之半丙  
申賜威烏爾古部貧民帛庚子如涼陁甲辰南府宰相  
王績薨乙巳振義州及諸路流民秋七月丙辰獵于黑  
嶺丁丑秦越王阿林薨九月乙丑駐蹕錫里濟冬十月  
庚辰以參知政事王經為三司使壬辰罷節度使以下

官進珍玩十一月甲寅以特哩袞耶律坦同知南京留守事遼興軍節度使耶律旺玖為南府宰相十二月己卯以樞密直學士呂嗣立參知政事是歲遣蕭德崇使于宋

四年春正月庚戌如混同江庚午免上京逋逃及貧戶稅賦丁丑曲赦西京役徒二月己丑如魚兒灤甲午曲赦春州役徒終身者皆五歲免己亥如春州赦泰州役徒三月乙丑免高麗歲貢己巳振上京及平錦來三州

饑夏四月己卯振蘇吉復錄鐵五州貧民并免其租稅  
甲申振慶州貧民乙酉減諸路常貢服御物丁酉立入  
粟補官法癸卯西幸五月乙卯振祖州貧民丁巳詔凡  
役徒終身者五歲皆免己未振春州貧民六月庚辰駐  
蹕散水原丁亥以燕王延禧知中丞司事以同知南院  
樞密使事耶律聶哱知右伊勒希巴事知右伊勒希巴  
事耶律納延同知南院樞密使事庚寅北院樞密使耶  
律佛德罷秋七月戊申曲赦奉聖州役徒丙辰遣使冊

李乾順為夏國王庚申如秋山己巳禁錢出境冬十月  
丁丑獵於遼水之濱己卯駐蹕藕絲淀癸未免百姓所  
貸官粟己丑知北院樞密使事耶律阿蘇封漆水郡王  
癸巳以伊寶大王耶律廸里知西北路招討使事權知  
西北路招討使事蕭休格知伊寶大王事壬寅照諸部  
長官親鞠獄訟十二月戊寅南府宰相耶律旺玖罷癸  
未以孟父詳袞耶律慎思為中京留守閏月癸卯朔豫  
行正旦禮丙午如混同江

五年春正月癸未如魚兒濼夏四月甲辰以知奚六部  
大王事尼格為本部大王壬子獵于北山五月丁亥駐  
蹕齊老嶺己亥以同知南院樞密使事耶律納延知右  
伊勒希巴事左祇候郎君班祥袞耶律聶知北院大王  
事六月壬戌以參知政事王言數為樞密副使前樞密  
副使賈士勛參知政事秋七月庚午獵于沙嶺九月壬  
辰駐蹕藕絲淀冬十月乙巳詔復行舊法令庚申以遼  
興君節度使哈噶為伊實大王冬十月丁卯朔以燕王

延禧生子大赦是歲遣蕭寅等使于宋

六年春正月如混同江二月辛丑駐蹕雙山夏四月庚子以同知南院樞密使事耶律托多知左伊勒希巴事五月壬辰駐蹕散水原六月甲寅遣使決五京囚秋七月丙子如黑嶺冬十月丁酉駐蹕竊絲浞十一月己巳以南府宰相竇景庸為武定軍節度使

七年春正月壬戌如混同江二月己亥駐蹕魚兒灤壬寅詔給渭州貧民耕牛布絹三月丙戌駐蹕黑龍江夏



四月丙辰以漢人行宮副部署耶律古裕知伊實大王  
事六月甲午駐蹕齊老嶺癸卯以權知東京留守蕭托  
輝為契丹行宮都部署秋八月壬寅如慶州九月丙申  
還上京己亥日本國來貢冬十月辛巳以燕王延禧為  
天下兵馬大元帥總北南院樞密使事十一月庚子如  
藕絲淀甲子望祀木葉山是歲遣耶律迪使于宋

八年春正月乙酉如山榆淀三月己亥駐蹕圖將寶淀  
丁未曲赦中京蔚州役徒夏四月丁丑獵於西山提克

德酋長呼喇濟來附五月甲辰駐蹕齊老嶺秋七月丁亥獵于沙嶺九月乙巳駐蹕藕絲淀冬十月庚戌朔遣使如宋丙辰振西北路饑辛酉準布默古斯殺金吾特古斯以叛遣奚六部圖哩耶律果桑發諸蕃部兵討之壬申南府宰相王經薨戊寅以左伊勒希巴耶律聶呼為彰聖軍節度使十一月戊子以樞密副使王是敦兼知樞密院事權參知政事韓資讓參知政事漢人行宮都部署奚和哩布知奚六部大王事丁酉振通州饑民

戊申北院大王赫魯薨

九年春正月庚辰如混同江二月獵于圖古哩克默古  
斯來侵三月西北路招討使耶律和囉木薩噶討之與  
戰不利夏四月癸酉獵于西山六月丁未朔駐蹕散水  
原庚申以遼興軍節度使榮格為南院大王知左伊勒  
希巴事耶律托多為左伊勒希巴秋七月辛卯如黑嶺  
八月獵於滿雅都山九月癸卯振西北路貧民冬十月  
庚戌默古斯偽降既而乘虛來襲西北路招討使托卜

嘉死之準布烏庫哩叛達勒達博索摩並寇倒塌嶺壬子籍諸路兵癸丑以南院大王特點同知南京留守事命鄭家努率兵援倒塌嶺甲寅駐蹕藕絲淀以左伊勒希巴耶律托多圍場都管薩巴並為西北路行軍都監乙卯詔以馬三千給烏爾古部丙辰準布長希達掠西路羣牧丁巳振西北路貧民己未以燕王延禧生子肆赦壬戌以樞密直學士趙廷睦參知政事兼同知南院樞密使事癸亥烏爾古德呼勒統軍使蕭休格奏討準

布等部捷甲子宋遣使告其母后曹氏哀即遣使弔祭  
十一月辛巳特默等奏討準布捷十二月丙辰宋遣使  
來饋其母后遺物

十年春正月如春水戊子烏爾古濟等來降達勒達博  
索摩二部來侵四捷軍都監特默死之二月丙午西南  
面招討司奏討博索摩捷癸丑巴雅爾布琳通古和克  
布格等來降達勒達來侵三月山北路副部署蕭阿魯  
岱奏討達勒達捷夏四月壬寅朔提克德敏達蘇魯克

都等各率所部來附甲辰駐蹕春州北平浞丙午烏爾  
古部節度使耶律辰嘉努奏討察察哩捷庚戌以知北  
院樞密使事耶律額特埒為都統伊勒希巴耶律托多  
為副統龍虎衛上將軍耶律呼哩為都監討默古斯辛  
亥休格奏巴哩巴八部來侵擊破之己巳除玉田密雲  
流民租賦一年閏月庚子賜西北路貧民錢達勒達博  
索摩二部來降五月甲辰駐蹕齊老嶺甲寅括馬戊午  
德時勒等部來侵招討司以兵擊破之敷睦宮太師耶

律愛努及其子死之辛酉以知國舅詳袞事蕭阿里同  
領西北路行軍事六月辛未宋遣使來謝弔祭乙酉烏  
爾古德呼勒統軍使休格以罪除名己亥禁邊民與蕃  
部為婚是夏高麗國王運薨其子昱使來告即遣使賻  
贈秋七月庚子朔獵于赤山是月準布等寇倒塌嶺東  
北路統軍使耶律實魯擊走之九月己未以南院大王  
特默為南院樞密使甲子德呼勒諸酋來降是月額特  
埒破默古斯冬十月丙子駐蹕藕絲淀癸巳西北路統

軍司獲準布長博碩科富魯等以獻十一月乙巳提克  
德通古準布迪里等來降達勤達及博索摩等復來侵  
山北路副部署阿魯岱擊敗之十二月甲戌以參知政  
事趙廷睦兼同知樞密院事樞密副使王師儒參知政  
事兼同知樞密院事乙酉詔改明年元減雜犯死罪以  
下仍除貧民租賦戊子西北路統軍司奏討默古斯捷  
壽隆元年春正月己亥如混同江戊戌博索摩來侵蕭  
阿魯岱等擊破之乙卯振奉聖州貧民二月戊辰賜左



右二皮室貧民錢乙亥駐蹕魚兒濼三月丙午賜東北  
路貧民絹夏四月丁卯額特埒奏討尼都格爾捷五月  
乙未朔以左伊勒希巴耶律托多為特哩袞南京宣徽  
使耶律特默為北院大王丁巳駐蹕特哩嶺六月己巳  
以知奚六部大王事和勒博為本部大王權參知政事  
趙孝嚴為漢人行宮都部署秋七月癸卯獵於沙嶺甲  
寅額特埒奏討默古斯捷九月甲寅祠木葉山冬十月  
甲子駐蹕藕絲淀甲戌以北面林牙耶律大悲努為右

伊勒希巴癸未以參知政事王師儒為樞密副使漢人行宮都部署趙孝嚴參知政事十一月己亥以都統額特埒為西北路招討使封漆水郡王十二月癸亥朔以知北院樞密使事耶律阿蘇為北院樞密使

二年春正月甲午如春水癸卯西南面招討司討博索摩破之乙卯駐蹕錫訥蘇辛酉給烏爾古德呼勒威烏爾古部貧民牛二月癸亥振達瑪林巴克部是月女真伐赫舍哩部阿蘇大敗之阿蘇來奔

據續通鑑綱目增輯夏四月

己卯振西北邊軍六月辛酉駐蹕薩拉納乃秋七月丙午獵于赤山九月丙午徙烏爾古德呼勒部于烏納水以扼北邊之衝冬十月戊辰駐蹕藕絲淀十二月己未額特埒討默爾吉破之壬戌南府宰相耶律都勒幹罷癸亥以蕭托卜嘉為北府宰相耶律大悲努殿前都點檢乙亥夏國獻宋俘

三年春正月丁亥如春水癸卯駐蹕雙山二月甲辰朔以南京水遣使振之丙午準布長穆色克尼木巴克長

托果斯默爾吉長呼喇巴等請復舊地貢方物許之高麗王昱薨夏四月南府宰趙廷睦出知興中府事以參知政事牛溫舒兼同知樞密院事五月癸亥額特埒討準布破之己巳駐蹕薩拉納六月甲申詔罷諸路馳驛貢新辛丑遣使如宋諷與夏和庚戌以契丹行宮都部署耶律烏頁為南院大王秋七月壬子朔獵于黑嶺八月己亥博囉滿達部長率其民來歸九月壬申駐蹕藕絲淀丁丑以武定軍節度使梁援為漢人行宮都部署

戊寅額特埒奏討默爾吉捷冬十月庚戌以西北路招討使額特埒為南府宰相十一月己未以中京留守韓資讓知樞密院事同知南院樞密使事蕭藥師努知右伊勤希巴丁丑西北路統軍司奏討默爾吉捷

四年春正月壬子如魚兒灤辛未宋遣使來饋三月庚午如春州夏五月癸酉納延奏北邊捷甲戌駐蹕薩拉納六月戊寅朔夏國為宋所攻遣使求援丁亥以遼興軍節度使聶埒為特哩衮前知特哩衮事耶律果桑為

南京統軍使甲午以參知政事牛溫舒兼知中京留守

事秋七月戊午如黑嶺冬十月乙亥朔駐蹕藕絲淀已

卯以南府宰相額特埒兼契丹行宮都部署十一月乙

巳朔遣知右伊勒希巴事蕭藥師努樞密直學士耶律

儼使宋諷與夏和

宋史作答書樞密院  
事蕭德崇與此異

辛酉夏復遣使

求援十二月壬辰為燕王延禧行再生禮曲赦三百里內

囚

五年春正月乙巳如魚兒灤己酉詔夏國王李乾順伐

博索摩等部夏五月戊辰以南府宰相額特埒兼西北  
路招討使禁軍都統已巳駐蹕沿柳湖六月甲申以奚  
六部大王和勒博為契丹行宮都部署知右伊勒希巴  
事蕭藥師努南面林牙兼知契丹行宮都部署事已亥  
以興聖宮使耶律赫嘉努為右伊勒希巴秋七月辛亥  
如達哩庫山閏九月丙子駐蹕都爾嘉冬十月已亥朔  
高麗王顯遣使乞封冊丁巳額特埒奏討尼都格爾捷  
丙寅以同知南京留守事蕭達勒達知北院樞密使事

丁卯宋遣使來聘戊辰振遼州饑仍免今歲租賦十一月甲戌振南北二紂十二月甲子以參知政事趙孝嚴為漢人行宮都部署漢人行宮都部署梁援為遼興軍節度使

六年春正月癸酉南院大王耶律烏頁薨壬午太師致仕托海起為奚六部大王丁亥如春水辛卯額特埒執默古斯來獻丙申詔問民疾苦二月丁未以烏爾古部節度使辰嘉努為南院大王己酉磔默古斯于市癸丑



出絹賜五院貧民辛酉宋主煦殂弟佖嗣位遣使來告  
即日遣使弔祭三月甲申弛朔州山林之禁夏四月癸  
卯如炭山五月壬午烏爾古部討察察哩破之乙酉漢  
人行宮都部署趙孝嚴薨丙戌駐蹕納克灤辛卯宋遣  
使饋其先帝遺物乙未以東京留守和囉木薩噶為特  
哩袞南院宣徽使蕭常格為漢人行宮都部署六月庚  
子遣使賀宋主即位辛丑宰相鄭顥出知興中府事韓  
資讓為崇儀軍節度使御史中丞韓君義為廣順軍節

度使戊午遣使決五京滯獄己未以遼興軍節度使梁  
援為樞密副使秋七月庚午如沙嶺壬申尼都格爾諸  
部寇西北路八月額特埒擊敗之九月癸未望祠木葉  
山戊子駐蹕藕絲淀冬十月甲寅以平州饑復其租賦一  
年十一月壬寅以天德軍民田世榮三世同居詔官之  
戊子夏國王李乾順請尚公主十二月己亥以知右伊  
勒希巴事赫嘉努為北面林牙辛亥詔燕王延禧擬注  
大將軍以下官宋遣使來謝是歲封高麗王顯為三韓

國公宋遣使來賀生辰正旦

七年春正月癸亥如混同江甲戌帝崩于行宮年七十  
諡曰仁聖大孝文皇帝廟號道宗

道宗清寧十年

其元年即興宗重熙二十四年

咸雍十年太康十

年大安十年壽隆七年凡四十七年

天祚皇帝諱延禧字延寧小字阿果道宗之孫父順宗  
為皇太子為耶律伊遜構死道宗後悔之諡為昭懷太  
子帝初封梁王加守太尉兼中書令後進封燕國王總

北南院樞密使事加尚書令為天下兵馬大元帥壽隆  
七年正月甲戌道宗崩帝奉遺詔即皇帝位于樞前羣  
臣上尊號曰天祚皇帝二月壬辰朔改元乾統大赦詔  
前為耶律伊遜所誣陷者復其官爵籍沒者出之流放  
者還之乙未遣使告哀于宋及西夏高麗乙巳以北府  
宰相蕭烏納為遼興軍節度使加守太傅夏六月庚寅  
朔如慶州甲午宋遣使來弔祭戊戌以南府宰相額特  
埒兼南院樞密使壬寅以宋魏王和囉噶為天下兵馬

大元帥乙巳進封北平王溥為鄭王丁未北院樞密使  
耶律阿蘇加裕悅辛亥葬道宗皇帝于慶陵秋八月甲  
寅謁慶陵九月壬申謁懷陵乙亥駐蹕藕絲淀冬十月  
壬辰謁乾陵甲辰上皇考昭懷太子諡曰大孝順聖皇  
帝廟號順宗皇妣曰貞順皇后十二月戊子以樞密副  
使張琳知樞密院事翰林學士張奉珪參知政事兼同  
知樞密院事癸巳宋遣使來賀即位丁酉高麗夏國並  
遣使來賀是歲生女真部節度使英格死傳于兄之子

武雅淑武雅淑死其弟阿古達襲

二年春正月如混同江二月辛卯如春州夏四月辛亥  
誅伊遜黨屬徙其子孫于邊發伊遜德勤岱之墓剖棺  
戮屍五月乙丑額特埒獻尼都格爾等部捷六月壬辰  
駐蹕散水原丙午夏國王李乾順復遣使請尚公主丁  
未南院大王辰嘉努罷壬子夏為宋所攻遣使求援閏  
月庚申策賢良秋七月獵于黑嶺準布來侵額特埒等  
擊敗之冬十月乙卯蕭哈里叛北面林牙赫嘉努捕之

蕭哈里亡入拜珠水阿克展部丙寅以南府宰相耶律額特埒為北院樞密使參知政事牛溫舒知北院樞密使事十一月壬寅以上京留守耶律慎思為北院樞密副使

三年春正月辛巳如混同江女真函蕭哈里首遣使來獻戊申如春州夏五月乙巳清署于齊老嶺六月辛酉夏國王李乾順復請尚公主秋九月獵于額魯哩山冬十月甲辰如中京庚申夏國復遣使求援己巳有事于

觀德殿十一月丙申羣臣上尊號曰惠文智武聖孝天祚皇帝大赦以宋魏王和囉噶為皇太叔梁王塔魯進封燕王鄭王淳為東京留守進封越王百官各進一階丁酉以特哩袞耶律和囉木薩噶為南院大王乙巳謁太祖廟追尊太祖之高祖曰昭烈皇帝廟號肅祖曾祖曰莊敬皇帝廟號懿祖十二月戊申如藕絲淀

四年春正月戊子如魚兒濼壬寅獵于木崩癸卯燕王塔魯薨夏六月甲辰駐蹕旺國崖甲寅夏國遣使求援



秋七月庚辰獵于南山癸未以西北路招討使蕭德勤  
代北院樞密副使耶律慎思並知北院樞密使事辛卯  
以同知南院樞密使事蕭迪里為西北路招討使冬十  
月己未如南京十一月乙亥御迎月樓賜貧民錢十二  
月辛丑以張琳為南府宰相

五年春正月乙亥夏國遣使求援且乞伐宋庚寅以遼  
興軍節度使蕭常格為北府宰相丁酉遣樞密直學士

高端禮

宋史及契丹國志俱作蕭良

等諷宋罷伐夏兵二月癸卯徵

行視民疾苦丙午如駕齋灋三月壬申以宗女南仙封  
成安公主下嫁夏國王李乾順夏四月甲申射虎于炭  
山五月癸卯清暑于南崖壬子宋遣使報聘六月甲戌  
夏國遣使來謝及貢方物己丑如哈爾吉秋九月辛亥  
駐蹕藕絲淀冬十一月戊戌禁商賈之家應進士舉丙  
辰高麗三韓國公王顯堯子俟遣使來告十二月己巳  
夏國復遣使求援癸酉宋遣使來議與夏約和

六年春正月辛丑遣知北院樞密使蕭德裕知南院

樞密使事牛溫舒使宋諷歸所侵夏地夏五月清暑于散水原六月辛巳夏國遣使來謝秋七月甲午如黑嶺庚子獵于鹿角山八月獵于審音布拉克山冬十月乙亥宋遣使以與夏通好來告庚辰以皇太叔南京留守和囉噶兼特哩袞東京留守越王淳為南府宰相十一月乙未以謝嘉努為南院大王瑪努勒為奚六部大王丙申行柴冊禮戊戌大赦以和囉噶為義和仁聖皇太叔越王淳進封魏王封子額魯溫為晉王寶訥埒為饒

樂郡王甲辰祠木葉山十二月己巳封耶律儼為漆水  
郡王餘官進爵有差

七年春正月釣魚于混同江二月駐蹕大魚濼夏六月  
次散水原秋七月如黑嶺冬十月獵于醫巫閭山

八年春正月如春州夏四月丙申封高麗王侯為三韓  
國公五月清暑于散水原六月壬辰西北路招討使蕭  
迪里率諸蕃來朝丙申射柳祈雨壬寅夏國王李乾順  
以成安公主生子遣使來告丁未如黑嶺秋八月獵于

柏山

九年春正月丙午朔如混同江二月如春州三月戊午  
夏國以宋不歸地遣使來告夏六月乙亥清暑于特哩  
嶺秋七月甲寅獵于哈爾吉冬十月癸酉望祀木葉山  
丁丑免今歲租賦

十年春正月辛丑預行立春禮如混同江二月庚午朔  
駐蹕大魚灤夏四月丙戌預行再生禮癸巳獵于北山  
六月甲戌清暑于玉丘秋七月壬戌皇太叔和囉噶薨

冬十月駐蹕藕絲淀十二月巳酉改明年元

天慶元年春正月釣魚于混同江二月如春州夏五月

清暑于散水原秋七月獵冬十月駐蹕藕絲淀是歲宋

遣鄭允中童貫來賀生辰

據續通鑑綱目增輯

二年春正月巳未朔如混同江二月丁酉如春州釣魚

于混同江夏四月如斧柯水六月庚寅清暑于南崖秋

七月乙丑獵於南山九月阿古達稱兵并旁近部族女

真卓克筭阿固齊拒之咸州詳袞司以聞詔詰責之冬

十月辛亥高麗三韓國公王俱以母死來告即遣使致祭是月駐蹕奉聖州十一月乙卯如南京

三年春正月丙寅賜南京貧民錢丁卯如大魚灤丙子獵于狗牙山三月籍諸道戶徙達里庫山圍場地居民于別土阿古達率五百騎突至咸州赴詳袞司與卓克筭等面折庭下阿古達不屈送所司問狀一夕遁去自是召不復至秋七月如秋山九月駐蹕藕絲淀冬十一月甲午以三司使虞融知南院樞密使事西南面招討

使蕭樂古為南府宰相十二月甲寅以樞密直學士馬人望參知政事丙辰知樞密院事耶律儼薨

四年春正月如春州女真遣使來索赫舍哩部人阿蘇夏五月清暑于散水原秋七月女真復遣使取阿蘇乃遣侍御愛寶布問境上多建城堡之故發渾河北諸軍益東北路統軍司阿古達以尼楚赫伊埒羅索棟摩等為帥集女真諸部兵攻寧江州時帝在慶州射鹿遣海州刺史高仙壽統渤海軍以援蕭托卜嘉遇女貞與戰



于寧江東敗績八月駐蹕藕絲淀冬十月壬寅以守司  
空蕭嗣先為東北路都統靜江軍節度使蕭托卜嘉為  
副發契丹奚軍中京禁兵土豪及別選諸路武勇以虞  
候崔公義為都押官控鶴指揮刑穎為副引軍屯出河  
店女真掩擊之蕭嗣先軍潰崔公義邢穎耶律佛哩蕭  
噶克實等死之十一月壬辰都統蕭迪里等又敗于沃  
稜濼東辛丑以西北路招討使耶律鄂爾多為行軍都  
統副點檢蕭伊實同知南院樞密使事耶律章努副之

十二月咸賓祥三州及鐵驪烏色皆叛附女真

屬國表伊作三年伊

實以兵援賓州南軍諸將實喇塔喇等往援咸州並為女真所敗

五年春正月下詔親征遣僧嘉努持書約和阿古達不從都統耶律鄂爾多等與戰于達哩庫城敗績二月饒州渤海古裕等反三月以蕭色佛埒等討之遣耶律章嘉努等齎書使于女真夏四月癸丑蕭色佛埒等為渤海古裕所敗以南面副部署蕭托斯和為都統赴之五

月托斯和及古裕戰敗績六月己亥朔清暑于特哩嶺  
癸丑以親征諭諸道丙辰托斯和招獲古裕等癸亥以  
特哩衮耶律摩哩為北院大王是月遣蕭色埒使女真  
見留秋七月辛未宋遣使致助軍銀絹丙子獵于嶺東  
是月都統鄂爾多等與女真戰于白馬濼敗績八月甲  
子罷獵趨軍中免鄂爾多等官丙寅以圍場使鄂博為  
中軍都統耶律章嘉努為都監率番漢兵十萬蕭奉先  
充御營都統諸行營都部署耶律章努為副以精兵三

萬為先鋒餘分五部為正軍貴族子弟千人為硬軍扈從百司為護衛軍北出駱駝口以都點檢蕭呼塔噶為都統樞密直學士柴誼為副將漢步騎三萬南出寧江州自長春州分道而進九月丁卯朔女真攻黃龍府下之己巳知北院樞密使蕭德勤岱出為西南面招討使帝親征女真將尼雅滿烏珠等以書來求戰己巳耶律章努反奔上京謀立魏王淳淳間道詣廣平淀待罪章努率麾下掠慶曉懷祖等州結渤海羣盜趨廣平淀犯

行宮順國女真阿固齊與戰敗之章努詐為使者欲奔  
女真為邏者所獲縛送行在伏誅冬十一月遣駙馬蕭  
特默林牙蕭察喇等將騎兵五萬步卒四十萬親軍七  
十萬至駝門十二月乙巳耶律章嘉努叛戊申帝親戰  
于和卜多岡敗績女真乘勝取渤海遼陽等五十四州  
據大金國志增輯 已未錦州刺史耶律珠展叛應章嘉努庚申  
以北面林牙耶律嗎古討之癸亥以北院宣徽使蕭罕  
嘉努知北院樞密使事南院宣徽使蕭特默為漢人行

宮都部署是歲宋賀生辰正旦使至留兩月不見而還

據文獻  
通考輯

六年春正月丙寅朔東京人殺留守蕭保先戶部使大  
公昂與副留守高清明捕斬之裨將渤海高永昌僭號

稱隆基元年遣蕭伊實高興順招之不從

金史在閏月  
與此稍異

閏月己亥遣蕭罕嘉努張琳討之戊午貴德州守將耶

律伊都以廣州渤海叛附于永昌二月戊辰侍御司徒

托卜嘉等討章嘉努戰于祖州敗績乙酉遣漢人行宮

都部署蕭特默率諸將討章嘉努戊子章嘉努攻陷高  
州三月東面行軍副統綽哈等擒中京賊侯槩于川州  
夏四月戊辰親征章嘉努癸酉敗之甲戌誅叛黨饒州  
渤海平丙子賞平賊將士有差而蕭罕嘉努張琳等復  
為賊所敗五月清暑于散水原女真攻下瀋州復陷東  
京擒高永昌東京州縣皆降之六月乙丑籍諸路兵有  
雜畜十頭以上者皆從軍庚辰魏王溥進封秦晉王為  
都元帥上京留守蕭托卜嘉為契丹行宮都部署兼副

元帥以知北院樞密使事蕭罕嘉努為上京留守秋七月獵于秋山春州渤海二千餘戶叛東北路統軍使勒兵追之盡俘以還八月烏爾古部叛遣中丞耶律托卜嘉等招之冬十月庚辰烏爾古部來降十一月東面行軍副統瑪古等攻哈斯罕敗績十二月乙亥封庶人蕭氏為太皇太妃辛巳削副統耶律瑪古官

七年春正月甲寅減廢馬粟分結諸局是月女真攻春州東北面諸軍不戰自潰農古皮室四部及渤海人皆



降之復下泰州二月涑水縣賊董龐兒聚衆萬餘西京  
留守蕭伊實南京統軍都監扎拉與戰于易水破之三  
月復破之于奉聖州夏五月庚寅東北面行軍諸將聶  
呼赫魯尼格錫庫等棄市乙巳詔圍場隙地縱百姓樵  
採六月辛巳以同知樞密院事額哩頁為北院大王秋  
七月癸卯獵于秋山八月丙寅獵于錫錫納琳山命都  
元帥秦晉王赴沿邊會四路兵馬防秋九月置怨軍八  
營屯衛州蒺藜山丁酉獵于輞子山冬十月乙卯朔至

中京十二月丙寅都元帥秦晉王淳與女真戰于蒺藜山敗績女真遂拔顯州庚午下詔自責癸酉遣使諸路募兵丁丑以西京留守蕭伊實為北府宰相東北路行軍都統哈瑪爾知奚六部大王事是歲女真阿古達即皇帝位建元天輔國號金仍遣使議和以求封冊

八年春正月如鴛鴦灤丁亥遣耶律努克等使金議和庚寅保安軍節度使張崇以雙州二百戶降于金東路諸州盜起掠民以充食二月耶律努克還自金三月甲

午復遣努克充使夏四月辛酉以西南面招討使蕭德  
勤岱為北院樞密使五月壬申努克以金書來戊戌復  
遣努克使金金主遣呼圖克與努克持書報如前約六  
月丁卯遣努克等齎宋夏高麗書詔表牒至金通祺繼  
遼四州民八百餘戶降于金秋七月獵于秋山金復遣  
呼圖克來議和八月庚午遣努克托迪使金議冊禮九  
月金遣努克還閏月丙寅遣努克復使金蕭博和哩等  
十五人各率戶降于金冬十月努克托迪持金書來龍

化州張應古等四人率其衆降金十一月副元帥蕭托卜嘉薨十二月甲申議定冊禮遣努克使金寧昌軍節度使劉宏以懿州戶三千降金時山前諸路大饑乾顯宜錦興中等路斗粟直數緡民削榆皮食之既而人相食

九年春正月金遣烏凌阿贊謨持書來迎冊二月至駕騫灤賊張薩巴僭稱尊號南面軍帥伊覲討論擒之三月丁未朔遣知左伊勒希巴事蕭實訥埒等冊金主為東

懷國皇帝夏五月準布布色齊等叛執招討使耶律鄂爾多都監蕭錫里岱死之秋七月獵于南山金復遣烏凌阿贊謨來責冊文無兄事之語不言大金而云東懷且語涉輕侮如依前書所定然後可從楊詢卿羅子韋率衆降金八月以趙王寶訥埒為西京留守九月至西京復遣寶訥埒楊立忠先持冊橐使金冬十月甲戌朔耶律辰圖努等二十餘人謀反伏誅是月遣使送烏凌阿贊謨持書以還

十年春二月如鴛鴦灤金復遣烏凌阿贊謨持書及冊  
文副本以來仍責乞兵于高麗三月己酉民有羣馬者  
十取其一以給軍庚申以金人所定大聖二字與先世  
稱號同復遣實訥埒徃議金主怒遂絕之夏四月獵于  
胡土白山五月金主親攻上京克外郭留守托卜嘉率  
衆出降祖懷慶等州皆陷

據文獻通考輯但通考載在明年則誤

六月乙

酉以北府宰相蕭伊實為上京留守知鹽鐵內省兩司  
東北統軍司事秋獵于沙嶺冬復至西京

保大元年春正月丁酉朔改元大赦樞密使蕭奉先誣駙馬蕭昱及伊覲等謀立晉王昱及達哈拉等伏誅晉王母文妃亦賜死伊覲大懼率千餘騎叛入金帝遣知奚王府事蕭錫默北府宰相蕭德恭大詳衮耶律特哩衮歸州觀察使蕭和尚努四軍太師蕭幹將所部兵追之及諸間山縣諸將縱之而還紹曰不及奉先勸驟加爵賞以結衆心乃以蕭錫默為奚王蕭德恭試中書門下平章事兼判上京留守事耶律特哩衮為龍虎衛上

將軍蕭和尚努金吾衛上將軍蕭幹鎮國大將軍二月  
如鴛鴦灤夏五月至赫呼蘇秋七月獵于炭山九月至  
南京冬十一月癸亥以西京留守趙王寶訥埒為特哩袞  
二年春正月乙亥金克中京進下澤州帝出居庸關至  
鴛鴦灤聞伊覲引金人奄至賜晉王死耶律薩巴等皆  
伏誅金人逼行宮帝如雲中遺傳國璽于桑乾河二月  
甲午以知北院大王事耶律瑪古漢人行宮都部署蕭  
特默並為都統大和宮使耶律布達副之將兵屯鴛鴦



灤已亥金師敗奚王哈瑪爾于北安州遂降其城三月  
辛酉帝趨白水灤乙丑羣牧使穆喇幹降于金丙寅帝  
至努庫特倉聞金兵將近乘輕騎入夾山左右執蕭奉  
先父子縛送于金金人斬其長子昂械奉先及其次子  
昱送金主遼軍奪以歸遂並賜死逐樞密使蕭德勤岱  
以托卜嘉典禁衛丁知以北院樞密副使蕭僧孝努知  
北院樞密使事同知北院樞密使事蕭扎拉為右伊勒  
希巴戊辰同知殿前點檢事耶律果巴率衛士降金已

已偵人蕭和尚牌印郎君耶律希肆為金師所獲癸酉  
以諸局百工多亡凡扈從不限吏民皆官之燕京留守  
宰相張琳李處溫等謀立秦晉王淳淳再三辭不獲已  
從之以處溫守太尉左企弓守司徒曹勇義知樞密院  
事虞仲文參知政事張琳守太師李處能直樞密院餘  
並授官有差大赦自稱天錫皇帝改元建福降封天祚  
帝為湘陰王遂據有燕雲平及上京遼西六路天祚所  
有沙漠已北西南西北路兩都招討府諸蕃部族而已

夏四月辛卯西南面招討使耶律佛騰降于金雲內寧  
邊東勝等州皆降阿蘇為金兵所擒金已取西京沙漠  
以南部族皆降帝遂遁於額蘇掄五月甲戌都統瑪古  
收集散亡會于額勒錦丙子以瑪古知北院樞密使事  
兼都統六月溥病卒衆立其妻蕭氏為皇太后主軍國  
事奉遺命迎立天祚次子秦王定為帝太后遂攝制改  
元德興賜李處溫死醫其子奭而磔之瑪克實以兵來  
援金人敗之洪灰水夏國援兵亦為金所敗秋七月丁

已德呼勒部皮室叛烏爾古部節度使耶律唐古討平之乙丑上京茂巴克實率二千戶降于金辛未夏國遣使來問起居八月戊戌帝與金師戰于石輦驛敗績都統蕭特默及其姪沙古被執辛丑會軍于歡塔察拉金兵追之急棄輜重以遁九月德呼勒部叛都統瑪古克之軍將郭藥師以涿易二州降于宋冬十月金兵攻蔚州降之是月宋師襲燕蕭幹擊敗之十一月帝率衛兵屯于羅克綏秦晉王淳妻蕭德妃五上表于金求立秦

王不許以勁兵守居庸金兵臨關戍卒潰德妃出古北口趨天德軍十二月金撫定南京左企弓等皆降帝遂由薩里關出居四部族詳袞之家

三年春正月丁巳奚王蕭幹僭號稱天復元年命都統瑪古討之甲子遼興軍節度副使張穀以平州降于金庚辰宜錦乾顯成川豪懿等州相繼皆降上京盧彥綸叛二月乙酉朔興中府降于金來州歸德軍節度使田顥權隰州刺史杜師回權遷州刺史高永昌權閏州刺

史張成皆籍所管戶降于金丙戌誅蕭德妃降淳為庶人盡釋其黨癸巳興中宜州復城守三月駐蹕于雲內州南夏四月甲申朔以知北院樞密使蕭僧孝努為諸道大都督丙申金兵至居庸關擒耶律達實戊戌金兵圍輜重于青塚硬寨太保特默格竊梁王雅里以遁秦王許王諸妃公主從臣皆陷沒丙午金遣兵邀戰于白水灤趙王寶訥埒蕭道寧皆被執帝遣牌印郎君摩勒幹送兔紐金印偽降遂西遁雲內駙馬都尉瑞諾爾詣

金降五月乙卯夏國王李乾順遣使請臨其國庚申軍將耶律迪里等夜劫梁王雅里奔西北部立以為帝改元神厯辛酉渡河止于金肅軍北蕭幹為衆所殺六月遣使冊李乾順為夏國皇帝秋九月耶律達實自金來歸冬十月復渡河東還居圖嚕卜部梁王雅里卒耶律珠拉繼之十一月圖烈為衆所殺

四年春正月帝趨都統瑪古軍金人來攻棄營北遁瑪古被執瑪克實來迎贐馬駝羊又率部人防衛至烏爾

古德呼勒部以都點檢蕭伊寶知北院樞密使事封瑪克實為神裕悅王特默格降于金二月耶律約蘇等謀叛伏誅夏五月金人驅燕民東徙平州張穀呂左企弓等殺之仍稱保大三年盡天祚象朝夕謁事必告而後行六月榜諭燕人復業秋七月金襲平州穀奔于宋帝既得林牙耶律達實兵歸又得陰山室韋瑪克實兵再謀出兵復收燕雲達實林牙力諫不從達實遂殺伊寶及博勒和置北南面官屬自立為王率所部西去帝遂



率諸軍出夾山下漁陽嶺取天德東勝寧邊雲內等州  
南下武州遇金人與戰于奄遏下水師潰直趨山陰八  
月國舅詳袞蕭托卜嘉筆硯祇侯察喇降金是月金主  
阿古達死九月建州降于金冬十月納圖嚕卜部人額  
爾克之妻阿克以額爾克為本部節度使扎古雅率衆  
降于金金攻興中府降之十一月從行軍亂北護衛太  
保珠展舍利詳袞額布勒等擊敗之十二月置二總管  
府

五年春正月辛巳党項小呼嚕遣人請臨其地戊子趨天德過沙漠金兵忽至帝徒步出走近侍進珠帽却之乘張仁貴馬得脫至天德己丑遇雪無禦寒具珠展以貂裘帽進途次絕糧珠展進麪與棗珠展輩惟齧冰雪以濟過天德將宿民家給以偵騎其家知之叩馬首跪而大慟潛宿其家數日嘉其忠遙授以節度使遂趨党項以小呼嚕為西南面招討使總知軍事仍賜其子及諸校爵賞有差二月至應州新城東六十里為金將完

顏羅索等所獲八月癸卯至金丙午降于海濱王以疾終年五十四葬于廣寧府閭陽縣乾陵傍

天祚帝乾統十年

其元年即道宗壽隆七年

天慶十年保大五

年凡二十五年

西遼附錄

按遼史天祚帝紀未附載北遼西遼事考耶律淳與雅里達實之立均在天祚未亡

之時有君而復君之于名義皆無足取惟是天祚既亡而達實尚艱難立國寡母弱子更繼迭承幾九十年而後絕亦所以延遼祚之一綫謹仍舊史附錄于後至淳與雅里則無異于篡逆之徒且其事又多詳

天祚紀中  
故不別著

耶律達實者世號為西遼達實字重德太祖八代孫也  
通遼漢字善騎射登天慶五年進士第擢翰林應奉尋  
陞承旨遼以翰林為林牙故稱達實林牙歷泰祥二州  
刺史遼興軍節度使保大二年金兵日逼天祚播越達  
實與諸大臣立秦晉王淳為帝淳死復立其妻蕭德妃  
為太后以守燕及金兵至蕭德妃走天祚天祚誅德妃  
而責達實曰我在汝何敢立淳達實曰陛下以全國之  
勢不能一拒敵棄國遠遁使黎民塗炭即立十淳皆太

祖子孫豈不勝乞命于他人耶天祚無以答賜酒食赦其罪達實終不自安遂殺蕭伊實博勒和自立為王率鐵騎二百宵遁北行三日過黑水達勒達詳袞崇烏魯獻馬駝羊若干西至哈屯城駐北庭都護府會威武崇德會蕃新大林紫河駝等七州及大黃室韋德埒勒昂吉喇特察察哩約喜布古德尼勒塔喇貴達瑪勒爾吉和卓烏庫哩準布博克碩寬唐古呼穆蘇希達濟勒貝十八部王衆得精兵萬餘置官吏立排甲具器仗明

年二月甲午以青牛白馬祭天地祖宗整旅而西假道  
回鶻回鶻王畢理克迎至即大宴三日獻馬馳羊願質  
子孫為附庸送至境外所過敵者勝之降者安之兵行  
萬里歸者數國獲馳馬牛財物不可勝計軍勢日盛至  
塔什干西域諸國舉兵十萬號呼喇繖來拒戰大敗之  
駐軍塔什干凡九十日回回國王來降貢方物又西至  
奇爾瑪勒羣臣上表勸進遂以乙巳歲二月五日即皇  
帝位

遼史乙巳作甲辰  
茲據甲子會紀改

號噶爾汗復上漢尊號曰天祐

皇帝改元延慶冊元妃蕭氏為昭德皇后自蕭額哩埒等四十九人並加祖父封爵有差延慶三年班師東歸馬行二十日得善地遂建都城號呼遜鄂爾多改延慶為康國元年三月以六院司大王蕭額哩埒為兵馬都元帥德埒勒部前同知樞密院事蕭托倫布副之察察哩部圖魯耶律雅克為都部署護衛耶律特爾格為都監率七萬騎東征以青牛白馬祭天樹旗以誓衆行萬餘里無所得牛馬多死勒兵而還達實曰皇天弗順數

也康國十年卒在位二十年廟號德宗子伊里年幼遺命以皇后權知國事后名塔布布延號感天皇后稱制改元咸清在位七年子伊里即位改元紹興籍民十八歲以上得八萬四千五百餘戶在位十三年卒廟號仁宗子幼遺詔以妹博克碩寬權國稱制改元崇福號承天太后在位十四年仁宗次子珠勒呼即位改元天禧在位三十四年時以秋出獵奈曼王庫楚埒伏兵擒之而據其位自天祚帝為金所執達寶建號沙漠之外凡



四世七十六年庫楚埒襲遼衣冠尊珠勒呼為太上皇  
朝夕問起居以待終焉珠勒呼死遼乃絕



欽定續通志卷四十六